




gojgaeq lwgnyez

Moulwg Beigiz • Dahsienheuj

小猪佩奇 • 牙齿仙子

Doenghbaez, miz duz moulwg coengmingz ndeu, coh de heuhguh Beigiz. Heuj de caezcingj youh hausak, de roxninh gig najrongh.

Beigiz caeuq daegnuengx de Gyauzci cungj rox yienghlawz baujhoh ndei gaihheuj, aenvih canghyw duz-ciengh son gvaq gyoengqde lo. Moix haet caeuq gyanghaemh, Beigiz caeuq Gyauzci cungj sijsaeq catheuj.

Beigiz caeuq Gyauzci gig yinx guhcaemz “cang canghywheuj”. Beigiz cang canghyw duz-ciengh, Gyauzci cang bouxbangfwngz canghyw duz-ciengh—duzdouq siujcej. Boubanzenzbingh couh dwg vanzgi Gyauzci—gunglungz sienseng.

Beigiz naeuz: “Heuj mwngz caezcingj youh hausak lai bw, gunglungz sienseng.” “Saekmaeq! Saekmaeq!” Gyauzci heuh dwk. “O, mboujloek, duzdouq siujcej, cingj mwngz hawj gunglungz sienseng boi raemx-riengxbak saekmaeq ndeu.” Beigiz naeuz.

Miz ngoenz ndeu, guh gvaq “cang canghywheuj” le, Beigiz caeuq Gyauzci hainduj gwn ringz lo. Sawqmwh, miz gijmiz doxgaiq doek roengz aenbuenz Beigiz daeuj lo. Beigiz diuq hwnjdaej! De cam: “Aiya, neix dwg gijmaz ha?” “Hw hw, neix dwg gaihheuj.” Daxboh de riu naeuz. “De daj gizlawz daeuj ha?” Beigiz youh cam. “Mwngz bae ciuq gingq

couh rox lo” Daxmeh de naeuz.

Beigiz bae ciuq gingq, raen gangzheuj gwnz bonjfaenh noix bae diuz ndeu lo! Beigiz simgip dangmaz, heuh naeuz: “A, dai lo! Raeuz dwg mbouj dwg bae ra canghyw duz-ciengh cijndaej ha?”

Daxmeh naeuz: “Mbouj yungh ne, dahniq, neix dwg heujcij, daengz seiz vuenh heuj de couh loenq lo.” “Heujcij? Gijmaz dwg heujcij ha?” “Heujcij couhdwg heuj lwgnding daih’it baez maj ok haenx.” “Yienghneix, gizneix lij maj ok heuj moq daeuj lwi?” Daxmeh ngaekngaek gyaeuj.

Beigiz youh cam: “Baenzlawz cawqleix diuz heuj loenq neix ne?” “Mwngz dawz de cuengq youq laj swiz, haemhneix dahsienheuj couh maz aeu diuz heuj neix bae lo, dangguh doxvuenh, de ndaej soengq hawj mwngz naed ngaenzdih ronghsaksak he.” Daxmeh yienghneix lwnh de.

Ngoenzneix gyanghaemh, Beigiz caeuq vunz ndaw ranz yawj densi seiz, lij siengj dahsienheuj gienh saeh neix.

De naeuz “Caj gou majhung le, gou hix siengj dang dahsienheuj!” Daxboh riu lo. De cam: “Mwngz ne, Gyauzci?” Gyauzci ceij coh gunglungz sienseng de, daihsing hemq: “Gunglungz(lungz)!”

“Vaiq daeuj, Gyauzci!” Beigiz heuh, “Gangj mbouj dingh

dahsienheuj couh yaek daeuj lo!” Gyoengqde buet hwnj gwnz laeuz bae, bwh ndei yienghyiengh yaek ninz lo.

Beigiz youh dawz diuzheuj loenq de sijsij saeqsaeq caiq cat gvaq baez ndeu. De siengj dawz de cat ndaej youh seuqsak youh ndei yawj, cij ndei soengq hawj dahsienheuj. Cat ndei le de couh dawz diuzheuj cuengq haeuj laj swiz bae. De cam daxmeh: “Mwngz haengjdingh dahsienheuj ra raen de ma?” “Gou haengjdingh.” Daxmeh naeuz, “mwngz couh caj youq ndaej lo.” Doeklaeng, bohmeah caeuq gyoengqde gangj gvaq ninzonj couh bae ninz lo.

“Gou mbouj ndaej ninz ndaek bw, gou yaek caj dahsienheuj daeuj!” Beigiz sim siengj, de lij lwnh Gyauzci mbouj ndaej ninz ndaek dem. Gyauzci hix dapwngq lo. Beigiz caj ha, caj ha……Sawqmwh, de dingqny miz gijmaz singyaem. De sim naemj dwg dahsienheuj daeuj loba, couh sing’iq cam Gyauzci: “Gyauzci, mwngz yawj-raen dahsienheuj caengz?” Mbouj raen Gyauzci ok sing, Beigiz ngaem gyaeuj baez yawj, yienzlaiz Gyauzci gaengq ninz ndaek lo, sing “hulu” haenx couhdwg de fat okdaej!

“Gou beij Gyauzci dingj ndaej hwnz.” Beigiz gag doiq swheij gangjvah. De ninz hwnj mbonq de bae, ngveihda cengq ndaej luenzloegloeg.

Hoeng, mbouj gvaq geij nanz, buengzda de couh hainduj doxhoenx lo. De ganjgip cengq hung lwgda de, youq ndaw sim doiq bonjfaenh naeuz: “Gou yaek baujiz singjsak, caj daengz dahsienheuj daeuj.” Hoeng, mbouj gvaq yaep he, de hix ninz ndaek lo……

Yubyab! Yubyab! De dwg gijmaz? Dwg dahsienheuj daeuj lo!

“Mwngz ndei ha, Beigiz!” De sing’ unq naeuz, “Mwngz nyienh aeu diuzheuj mwngz daeuj vuenh naed ngaenzdih lwi?” De dawz ngaenzdih saek haeuj laj swiz Beigiz bae, aeu diuzheuj okdaej. “Diuzheuj neix geijlai sawsak geijlai ndei yawj ha, gyo’mbaiq mwngz!”

Haet daihngaih, Beigiz mbat hai da couh diuq hwnjdaej, bae yawj laj swiz de. “Va, naed ngaenzdih ronghsagsag he!” De itmienh hem itmienh diuq. “Meh, dahsienheuj caen daeuj gvaq lo! Gou maqmuengh de gyaenz diuzheuj youh saw youh ndei gou.”

“De haengjdingh gyaenz. Mwngz cat ndaej geijlai sijsaeq ha!” Daxboh riu dwk naeuz.

“Ai, hojsik mbouj ndaej raennaj dahsienheuj.” Beigiz danq gaemz heiq ndeu, “Baezlaeng gou itdingh daengx haemh mbouj ninz, caj daengz de daeuj cij ndaej. Hw! Hw! Hw!”

(Ouh Caijfangh hoiz)

Loek Youh Gya Loek

错上加错



Miz ngoenz he cuengqhag le, gou caengz guh sat cozyez couh buet okbae guhcaemz lo.

Gwn haeuxcaez le, daxboh genjcaz cozyez gou, cam: “Song yieb daezbaksuenq ngoenzneix guh caengz?” Gou haengjdingh dwk naeuz: “Guh lo.” Daxboh

youh cam: “Mwngz caen guh la?” Gou naeuz: “Guh lo.”

Daxboh biengj bonj daezbaksuenq, vix aen’ gvaengz sei-fueng baihlaj cam: “Doiqhauh ndaw gvaengz sei-fueng buet bae gizlawz loha?” Baezgonq guh sat daezbaksuenq le, daxboh youq ndaw gvaengz sei-fueng sij hwnj doiqhauh. Gou cijndei nyinhloek: “Daezbaksuenq ngoenzneix gou caengz guh.”

Daxboh gig haenq baebingz gou, gou gvaigvai bae guh cozyez lo. Gou guh sat le, daxboh naeuz: “Mbouj guh cozyez lij yaeh vunz dwg loek youh gya loek, mwngz neix dwg yaeh vunz yaeh bonjfaenh.” Gou naeuz: “Gou loek lo, baezlaeng itdingh mbouj yienghneix lo.” Daxboh naeuz: “Rox loek naengz gaj couhdwg lwgnyez ndei.”

(Ngeih nienzgaep Lij Yiyangz)

Daeggo Dang Lauxsae

哥哥当老师

Daegnuengx ngamq hag geq soq, moix baez geq daengz 19、29 couh mbouj rox geq lo. Daeggo raen le, gietdingh bang daegnuengx.

Daeggo siengj ok aen banfap he: “Raeuz daeuj guhcaemz naedfaex ba!” Daegnuengx raen daeggo baenzneix gangj le anq raixcaix. Daeggo heuh daegnuengx moix baez dawz ok 10 naed naedfaex, dawz ok song baez le, daeggo cam: “Seizneix dawz ok naedfaex dwg geijlai naed?” Daegnuengx siengjsiengj le, naeuz: “Seizneix dwg 2 aen cib lo, dwg 20 naed naedfaex!” Baezneix, daeggo heuh daegnuengx dawz ok 9 naed, daeggo aeu 9 naed neix caeuq 20 naed haxbaenh haenx cuengq youq doxcaez, cam: “Mwngz yawj, seizneix couhdwg 29 naed lo. Danghnaeuz caiq gya 1 naed, dwg geijlai?” Daegnuengx dap: “3 aen cib dwg 30. O, gou rox lo, baihlaeng 29 dwg 30!” “Deng! Daegnuengx caen coengmingz! Neix dwg soqgovei rim cib, soqcihvih couh haeuj it!” Ciepdkw, daeggo moix baez bungz-daengz geijcibgouj seiz, cungj cam daegnuengx aensoq baihlaeng dwg geijlai, daegnuengx geiq ndaej “rim cib haeuj it” aen gveihcwz neix, couh cungj gangj ndaej deng lo.

(Cwnz Yauj)

